

## MIGRANTI

### A chjama di Pierrot Pantel pà salvà i disgraziati di u Sea Watch

Inspettore di l'ambiente in Aiacciu, Pierrot Pantel propone d'accoglie in Corsica i 32 migranti di u battellu Sea Watch, in aspetta à u largu di Malta. A so petizione di più di 2 400 ziffre dumanda à Gilles Simeoni d'agisce è di "fà sente a voce storica di a Corsica", aiutendu 'ssi disgraziati salvati da l'annegamentu u 22 di dicembre scorsu. "S'è l'Europa si vole indegna, è ch'ellu ferma un territoriu duve brusgia

sempre a fiamma di l'umanità, ch'ella sia a Corsica!" U presidente di l'esecutivu è l'eletti di a CdC ùn anu ancu rispotu.

GHJ. P.

## MUNTAGNA

### U monte Ritondu cotratu

In stu principiu d'annata, e neve fermanu alte in muntagna. U lavu di a Vetta Niella, à 2321 metri d'altitudine, ferma cotratu più di sei mesi à l'annu. Di fatti, ghjè à più grande patinatoghja di Corsica. Ma si paga quantunque tre ore di marchja è di sforzu per sbocà.

Da sopra, u Monte Ritondu (2622 metri) cura tuttu u rughjone imbiancatu. Ste neve un seranu più da strughje chè di ghjunghju o di lugliu.

J.-F. P.

## TIMPURALE

### A Corsica fulminata

2018, annu di tonu è di saette in Corsica. L'annu scorsu, l'isula hè statu u rughjonu u più fulminatu di u paese. Cù 3,13 saette ogni chilometru quadratu, a Corsica batte una prova maestra, inc'una frequenza d'accendite eccezzionale: più di u doppiu di a media naziunale.

J.-P. S.

## PASTIZZERIA

### Delphine Morellini, finalista di "Les rois du gâteau"

Agiovana di Moriani, Delphine Morellini hè ghjunta in finale di l'emissione "les rois du gâteau" presentate da i sceffi pastizzeri Cyril Li gnac è Frédéric Bau. Hà fattu un biscottu di farina castagnina è di nucellule. Una manera di mette in valore i prudutti isulani. Era stata selezionata mez'à più di sessanta partecipanti.

P.-M. S.



/RITRATTU J.-F. P.